

Održavanje sigurnosti i stabilnosti



Kao rezultat pomaka u sigurnosnoj situaciji, EUFOR je mogao da zauzme diskretan i neupadljiv položaj, i broj međunarodnih trupa u Bosni i Hercegovini treba da se smanji na proljeće, naglasili su visoki predstavnik/specijalni predstavnik EU Christian Schwarz-Schilling i komandant EUFOR-a, kontra-admiral Hans-Jochen Witthauer, u zajedničkom članku objavljenom u današnjoj štampi.

Na sastanku održanom početkom mjeseca, ministri vanjskih poslova zemalja članica EU donijeli su načelnu odluku da smanje broj trupa u Bosni i Hercegovini, i planiranje za ovo smanjenje trupa je već u toku. Konačna odluka o realizaciji plana o smanjenju broja trupa, najvjerovaljnije sa 6,000 na 2,500 ljudi trebalo bi da bude donesena krajem februara.

“Kao i u prethodnim prilikama, ova odluka će se zasnovati na temeljitoj procjeni sigurnosne situacije u Bosni i Hercegovini i regionu”, napisali su visoki predstavnik/specijalni predstavnik EU i komandant EUFOR-a u članku objavljenom danas u *Dnevnom avazu, Nezavisnim novinama i Večernjem listu*. “Evropska unija neće ugroziti teško stečenu sigurnost ove zemlje.”

“Planirano smanjenje ne bi se trebalo tumačiti kao slabljenje opredjeljenja Evropske unije da ostane prisutna u Bosni u Hercegovini”, navode dva visoka međunarodna zvaničnika. “Umjesto toga, treba ga gledati kao odraz ogromnog napretka

koji je ova zemlja postigla u jačanju sopstvenih sigurnosnih struktura".

Christian Schwarz-Schilling i admiral Witthauer također su istakli da su ljudi koji po prvi put obilaze Sarajevo i druge gradove u Bosni i Hercegovini često prijatno iznenađeni kako život u ovoj zemlji izgleda relaksiran i normalan.

"Činjenica je da je normalan svakodnevni život u Bosni i Hercegovini jedno od velikih postignuća mirovnog procesa. To svjedoči koliko daleko je ova zemlja otišla u posljednjih nekoliko godina," napisali su.

Visoki predstavnik/specijalni predstavnik EU i komandant EUFOR-a naglasili su da Evropska unija trenutno radi na jačanju svog civilnog prisustva u Bosni i Hercegovini, kako bi se ovoj zemlji pomoglo na putu ka punoj integraciji u Evropu te da će EUFOR ostati u ovoj zemlji sve dok međunarodno vojno prisustvo bude potrebno.

"Sljedeće godine EUFOR će biti manji, no on će zadržati isti energični mandat u oblasti očuvanja mira, u skladu sa poglavljem VII Povelje UN-a i Daytonskim sporazumom", istakli su.

Međunarodni operativni bataljon biće stacioniran u Sarajevu a timovi za vezu i posmatranje biće raspoređeni po cijeloj zemlji. Na taj način, EUFOR će biti u stanju da riješi ili odvrati bilo kakvu prijetnju miru u Bosni i Hercegovini te da pruži podršku Međunarodnom krivičnom sudu za bivšu Jugoslaviju u Hagu, između ostalog i u hapšenju osumnjičenih za ratne zločine.

Ukoliko se ukaže potreba, EUFOR će također moći pozvati direktno pojačanje u obliku trupa stacioniranih u bliskom okruženju, istih onih snaga koje su u martu 2004 služile kao pojačanje jedinicama NATO-a na Kosovu. Štaviše, EUFOR će neko vrijeme zadržati mogućnost da povuče odluku o smanjenju trupa i ponovo uspostavi jače prisustvo u zemlji, ukoliko se to bude

činilo neophodnim.

“Takvo planiranje, pri kojem se uzima u obzir najgori scenario, istovremeno je i mjera opreza a i standardna procedura. Niko ne očekuje da će je biti potrebno provesti”, zaključili su Christian Schwarz-Schilling i admiral Witthauer. “Umjesto toga, nadamo se i očekujemo da će se sigurnosna situacija i dalje popravljati sve dok ne postane samoodrživa.”

Tekst članka dostupan je u cijelosti na www.ohr.int i www.eusrbih.org.